

Visoki predstavnik se sastao sa predsjednikom Austrije Thomasom Klestilom

Visoki predstavnik Wolfgang Petritsch se jutros u Sarajevu sastao sa predsjednikom Austrije Thomasom Klestilom. Visoki predstavnik je informirao austrijskog Predsjednika o posljednjim političkim zbivanjima u Bosni i Hercegovini, s posebnim osvrtom na reformu entitetskih Ustava i reformu pravosudnog sistema. Istakao je kako je proces ustavne reforme veoma značajan da bi BiH postala zemlja u kojoj će prava i vitalni nacionalni interesi konstitutivnih naroda i građana biti u potpunosti zaštićeni i u kojoj će oni biti u potpunosti zastupljeni u zakonodavnim, izvršnim i pravosudnim organima. Nove administrativne i političke strukture osiguraće punu zaštićenost interesa svih konstitutivnih naroda na teritoriji cijele Bosne i Hercegovine.

Visoki predstavnik je informirao predsjednika Klestila o razvoju događaja u procesu povratka izbjeglica, s posebim osvrtom na skoro 100.000 manjinskih povratnika tokom protekle godine. Govorio je i o tome da je od ključnog značaja da se u BiH privuku strane investicije. Već je pripremljen teren kako bi strani investitori prepoznali ovo područje kao jedan od ozbiljnih poslovnih potencijala. Visoki predstavnik je zahvalio predsjedniku Klestilu, koji je doputovao kao vođa velike delegacije austrijskih privrednih predstavnika, za napore koje je uložio u jačanje ekonomskih veza sa BiH. Predsjednik Klestil je izrazio punu podršku radu visokog predstavnika. Kazao je kako je veoma značajno da se Bosna i Hercegovina približi Evropskoj uniji, izrazivši svoju zahvalnost za napore koje je Visoki predstavnik uložio u ovom smislu.

Predsjednik Klestil boravi u posjeti Bosni i Hercegovini po drugi put. Tokom svoje posjete 1996. godine on je uručio donaciju za obnovu Nacionalne biblioteke. Wolfgang Petritsch je tom prilikom bio u sastavu delegacije, i to ispred grada Beča.